

Messadi per la radunanza communal Surses digls 25 d'otgover 2021

La suprastanza communal Az sottametta, stimadas votantas e stimos votants, igl rapport e las propostas concernent igls affars suandonts:

Indemnisaziun da scadenza e contract da concessiun cun ewz (Ovra electrica digl martgea da Turitg) pertutgont l'ovra electrica Casti vest; tractamaint e deliberaziun digl affar per mangs dalla votaziun all'urna digl cumegn da Surses

La suprastanza communal recumonda allas votantas ed agls votants d'acceptar l'indemnisaziun da scadenza ed igl contract da concessiun e da deliberar igl affar per mangs digl cumegn d'urna Surses cun proponer d'approvar las propostas.

Igl ewz magna siva digl 1949 l'ovra electrica Casti vest. Chella cumpeggia igl lai da Burvagn scu er ena galareia ed en conduct da pressiun tgi magna agl bietg effectiv dall'ovra electrica. Chel sa catta l'ò, noua tgi l'Alvra sbucca aint igl lai da rampar da Nisealas (Solaz). Da menziunar è er tg'igls dus uals Balandegn e Mulegn sot Salouf e Mon vignan er tschaffos e tratgs a nez. Igl ewz ò survagnia ena concessiun per chel menaschi, tgi scroda igls 2 da fanadour 2022.

Igl onn 1969 ò igl ewz biagia l'ovra electrica Casti ost. Per chella ò igl ewz survagnia ena concessiun anfignen igl 2050. Chell'ovra electrica magna l'ava dall'ovra electrica Tinizong directamaintg agl edifezi "Casti ost", tgi era nia biagia ve digl edifezi existent "Casti vest". Cotras corra siva digl 1969 considerablaintg pi pac'ava aint igl lai da Burvagn. L'ovra electrica Casti vest produtgescha siva da l'ò correspondentamaintg pi paca energiea electrica. Per chel muteiv on igls uriunds cumegns gia mess an vista agl ewz da pudeir manar anavant l'ovra electrica Casti vest anfignen igl 2050, parallel cun l'ovra electrica Casti ost.

Cunchegl tgi la concessiun Casti vest scroda, scu menziuno, igls 2 da fanadour 2022 on contracto igls cumegns Alvra e Surses, igl cantun Grischun (departamaint d'infrastructura, energiea e mobilitad) ed igl ewz la cuntinuaziun digl menaschi dall'ovra electrica Casti vest anfignen igl 2050. Chegl pretenda ena nova concessiun.

Tenor lescha pudessan igls cumegns Alvra e Surses surpiglier l'ovra electrica Casti vest igls 2 da fanadour 2022 ansemen cun igl cantun Grischun, chegl vot deir, far valeir igl dretg da scadenza. Igl pertutgias è sa cunvignias da renunztgier alla scadenza, resp. da suspender ella sen igl 2050. Per chella renunztga alla scadenza antras igl cantun ed igls cumegns stò igl ewz paer en'indemnisaziun da 12.5 miu. francs. Per paia pò igl ewz gestiunar anavant l'ovra electrica anfignen igl 2050. La somma da chesta indemnisaziun per la renunztga dalla scadenza s'orientescha alla valour digl retgav dall'ovra electrica sen la fiera d'energiea.

Novas disposiziuns legalas pertutgont la cumpatibladad ecologica

Cun igl nov concessiunamaint ston neir adampleidas tot las disposiziuns actualas legalas, spezialmaintg chellas dalla protecziun dallas avas e digl ambiaint. Per chel scopo è nia intercurria quant'ava tgi stò esser avant mang tranter Burvagn e Casti per garanteir en ambiaint intact e sang. Fissan igls implants electrici da Marmorera e da Burvagn betg nias biagias ainten la Gelgia, curriss bler duple ava tgi oz. Per chel muteiv stò neir surlaschea considerablaintg duple ava da Burvagn ainten la Gelgia a parteir digls 2 da fanadour 2022. Chell'ava restanta tg'è necessaria e prescritega ainten la lescha, stò neir fixada tenor las deflussiuns naturalas. Tenor la planisaziun actuala vign l'ava restanta a Burvagn manada localmaintg sur ena pitschna turbina. Chell'ovra electrica da dotaziun stò pir anc neir biageida. Ella vign a produtgier mintg'on radond 1 oura gigawatt energiea electrica.

Ava restanta è necessaria e preziosa per l'ecologia dalla Gelgia, redutgescha pero la produciun d'energiea electrica. Actualmaintg produtgescha l'ovra electrica Casti vest radond 76 ouras gigawatt energiea ad onn.

Agl avigneir vign chegl ad esser angal ple ca. 46 ouras gigawatt. Cun chel nov concessiunamaint vign igl indrez a saveir neir mano da maniera optimala anfignen igl 2050. Ulteriour potenzial per en angrondamaint è betg avantmang.

Quota digl tschains d'ava

Igls cumegns Alvra e Surses on incumbenzo en post spezialiso extern d'examinar la clav da repartiziun actuala e da dar en pareri respectiv. Ainten la clav da repartiziun d'anfignen ossa ("vigil") era la muntada digl lai da Burvagn neida calculada cun 10.6%, considerond la quantidad dall'ava restanta pi ota arisguard la plevallour da producciun. Uscheia era sa resultada la clav da repartiziun suandonta:

- o Cumegn d'Alvra 58.84 %
- o Cumegn da Surses 41.16 %

Tenor pareri vign igl effect digl lai da Burvagn culculo alla basa dallas cundiziuns tgi èn midadas per part sen 5%. Cotras sa meida la clav da repartiziun scu suonda:

- o Gemeinde Albula/Alvra 61.92 % **62 %**
- o Gemeinde Surses 38.08 % **38 %**

Retgav pigls cumegns Alvra e Surses

Per pudeir trer a nez l'ava dalla Gelgia e dall'Alvra ainten l'ovra electrica Casti vest paia igl ewz igls suandonts imports unics:

- 12.5 miu. CHF agls cumegns ed agl cantun per avoir renunztgia alla scadenza dall'ovra electrica. Chel import vign repartia scu suonda:
 - o Cantun Grischun: 46.7 % CHF 5'837'500.00
 - o Cumegn Alvra e Surses 53.3 % CHF 6'662'500.00
 - o Cumegn Alvra: 62.0 % CHF 4'130'750.00
 - o Cumegn Surses: 38.0 % CHF 2'531'750.00
- Igl ewz paia pinavant ena taxa da concessiun unica da fr. 198'250.00 agls dus cumegns Alvra e Surses ansemen.
- Pigls costs durant las tractativas paia igl ewz alla fegn finala mintgamai fr. 15'000.00 ad Alvra e Surses.

Ultra da chels paiamaints unics vignan vetiers ulteriours paiamaints annuals. Per l'egna è chegl en'indemnisaziun per energiea gratuita ed energiea da preferientscha. Chella sa drezza tenor igl prietsch d'energeia actual, cun en prietsch maximal e minimal. Per l'otra pertotga chegl igl tschains dall'ava.

Per la part digls cumegns paia igl ewz igl maximum tenor igl dretg federal. Igl tschains dall'ava vign calculo a basa dall'utilisaziun dall'ava teoretica sen fundamaint dalla pendenza e dalla quantidad d'ava utilisabla, e betg tenor la quantidad dall'energeia produtgeida. Sotvart suonda ena cumparegliaziun traversala digls imports cun la concessiun actuala:

Indemnisaziun ewz, an CHF/onn	Anfignen ossa (concessiun actuala): valour media 2018 - 2021	Siva digl nov concessiunamaint sch'igl prietsch da fiera schea tar 50 CHF/ouras megawatt	Siva digl nov concessiunamaint sch'igl prietsch da fiera schea tar 90 CHF/ouras megawatt
Energiea gratuita ed energiea da preferientscha Alvra	80'962.00	20 000.00	50 000.00
Energiea gratuita ed energiea da preferientscha Surses	42'962.00		
Tschains d'ava Alvra	40'400.00	~420 000.00	~420 000.00
Tschains d'ava Surses	28'300.00		
total	192'624.00	~440 000.00	~470 000.00

Betg enumeradas èn las taxas unicas e la taglia cantunala annuala per las ovras idraulicas tg'igl ewz ò da paer complementarmaintg.

Chels imports annuals, scu er las taxas da concessiun vignan repartias tranter igls dus cumegn tenor la suandonta clav: Alvra: 62%, Surses: 38%. Chella clav corresponda alla contribuziun digls cumegn ve dalla valeta digl implant. Chella vign defineida surtot alla basa dalla la pendenza dalla Gelgia segl territori communal respectiv e la quantidad d'ava utilisada per cumegn.

Per recapitular: igl ewz vign a produtgier siva digl 2022 considerablamentg pi paca energiea. Las antradas digls cumegn vignan pero a s'augmentar perveia dalla nova lescha davart la quota d'ava restanta.

Proposta dalla suprastanza communal:

La suprastanza propona alla radunanza communal,

- d'approvar l'indemnisaziun da scadenza dalla concessiun cun ewz pertutgont l'ovra electrica Casti vest e da deliberar igl affar cun la proposta d'approvaziun per mangs digl cumegn d'urna Surses.
- d'approvar igl contract da concessiun cun ewz pertutgont l'ovra electrica Casti vest e da deliberar igl affar cun la proposta d'approvaziun per mangs digl cumegn d'urna Surses.

Convignientscha cun igl ewz (Ovra electrica digl martgea da Turitg) davart la regulaziun transitorica per far adiever dalla forza hidraulica dalla Gelgia ainten l'ovra electrica da Casti vest

La suprastanza communal recumonda d'approvar la convignientscha cun igl ewz davart la regulaziun transitorica per far adiever dalla forza hidraulica dalla Gelgia ainten l'ovra electrica da Casti vest, anfignen tg'igl contract da concessiun è stipulo (varda tractanda precedentia).

La concessiun existenta cun igl ewz digls 24/25 da favrer 1942 per far adiever dalla forza hidraulica dalla Gelgia ainten l'ovra electrica da Casti vest scada igls 2 da fanadour 2022. Scu chegl tgi gl'è nia menziuno ainten la tractanda precedentia, èn igls cumegn Alvra e Surses scu er igl cantun Grischun sa convignias per ena renovaziun dalla concessiun cun l'Ovra electrica digl martgea da Turitg (ewz). Igl cumegn d'Alvra vign a tractar la dumonda da concessiun a caschung dalla radunanza communal digls 5 da november 2021, dantant tg'igl cumegn d'urna digl cumegn da Surses ò da decider definitivmentg davart l'approvaziun igls 28 da november 2021.

La concessiun nova vo an vigour pir siva dall'approvaziun antras la regenza digl cantun Grischun. Cunchegl tgi gl'è da chintar tgi la concessiun nova geia betg anc an vigour igls 2 da fanadour 2022, ins ò da far ena regulaziun transitorica.

1. La validad dalla concessiun digl ewz digls 24/25 da favrer 1942 resta an vigour

La concessiun digl ewz digls 24/25 da favrer 1942 cun l'aggiunta digls 15 d'avregl 1965 resta an vigour cun resalva dallas suandontas midadas anfignen tar l'approvaziun dalla concessiun nova antras la regenza digl cantun Grischun.

2. Tschains d'ava a parteir digls 3 da fanadour 2022

Art. 5 dalla concessiun digls 24/25 da favrer 1942 vign ramplazzo dalla suandonta determinaziun:

- Per conceder igl dretg d'adiever dalla forza hidraulica dalla Gelgia paia igl concessiunari a parteir digls 3 da fanadour 2022 en tschains d'ava annual pauschal da CHF 246'850.00 (= corresponda alla media digl tschains d'ava d'anfignen ossa e da chel futur) per tots dus cumegn. Igl tschains d'ava scada mintgamai per igls 31 da mars digl onn vegnent. Per igl amprem onn da menaschi antschet, ò igl tschains da neir paea pro rata.
- Igl ewz paia igl tschains d'ava cun validad giuridica agl cumegn d'Alvra. Igl cumegn d'Alvra paia la part digl cumegn da Surses mintgamai anfignen igls 30 d'avregl.

3. Dotaziun dalla quantidad d'ava a Burvagn

Igl art. 15 dalla concessiun digls 24/25 da favrer 1942 vign ramplazzo dalla suandonta determinaziun:

- Per la dotaziun dalla Gelgia cun ava restanta a Burvagn vala l'ordinaziun dalla regenza digl cantun Grischun nr. 1109 digls 20-12-2016.

4. Energiea gratuita e da preferientscha

Igl art. 6 dalla concessiun digls 24/25 da favrer 1942 vign ramplazzo dalla suandonta determinaziun:

- Igl dretg ad energiea gratuita e da preferientscha vign indemniso da moda pauschala cun CHF 35'000.00 per onn (onn 2021: CHF 28'070.00 / onn 2020: 28'275.00 / onn 2019: CHF 28'170.00). Igl exista nign dretg da furniziun d'energiea reala. Per en onn antschet, ò l'indemnisaziun da neir paeda pro rata.

Er la cunvignientscha preschainta davart la regulaziun transitoria ò da neir approvada dalla regenza digl cantun Grischun.

Tenor igl art. 28 cefra 5 dalla constituziun digl cumegn da Surses, ò la concessiun ed ena midada «essenziala» dalla concessiun per igl adiever d'ava da neir sottamessa agl cumegn d'urna per l'approvaziun. Essend tgi la regulaziun transitorica sa basa sen la concessiun existenta ed è valevla angal anfignen tgi la concessiun nova aintra an vigour, pò la cunvignientscha neir tractada da moda finala dalla radunanza communal. Cun oters plets, l'approvaziun dalla regulaziun transitorica è an cumpetenza dalla radunanza communal e vign perchehl tractada da moda separada.

Proposta dalla suprastanza communal:

La suprastanza propona alla radunanza communal d'approvar la cunvagnientscha cun igl ezv davart la regulaziun transitorica per far adiever dalla forza hidraulica dalla Gelgia ainten l'ovra electrica da Casti vest anfignen tgi la nova concessiun vo an vigour.

Lescha davart la protecziun dalla populaziun digl cumegn da Surses

La suprastanza communal recumonda en EA alla lescha davart la protecziun dalla populaziun digl cumegn da Surses, tgi prevei la protecziun dalla populaziun e la sia basa da veiver an situaziuns spezialas ed extraordinarias.

Tenor art. 11 e 15 dalla lescha davart la protecziun dalla populaziun digl cantun Grischun digls 17-06-2015 (stadi: 01-01-2016), èn igls cumegns responsabels per igl provedimaint e per dar damogn ad evenimaints da situaziuns spezialas ed extraordinarias sen igl territori communal. La suprastanza communal definescha la structura ed organisaziun dall'organisaziun da catastrofas resp. da crisas e stgaffescha en stab directiv digl cumegn, schinavant tgi gl'è prescretg navot oter ainten chella lescha u aint igl dretg superiour.

Scopo

La lescha regla las cumpetenzas ed igls pensums digls cumegns, digl cantun scu er da singuls partenaris dalla protecziun dalla populaziun concernent igl provedimaint an situaziuns spezialas ed extraordinarias e per dar damogn a talas. Tar chegl totga la preparaziun, l'ordinaziun e la realisaziun da maseiras per proteger la populaziun da fenomens dalla nateira scu lavegnas, bovas, inundaziuns, incendis da gòts, etc. dd otras situaziuns spezialas.


Teratrembels, maloras, interrupziun digl provedimaint current e pandemia èn angal en pèr prievels da bliers, digls quals la populaziun da Surses pudess esser pertutgeida.

Noziuns

- *Situaziun normala*: ainten la situaziun normala tanschan igls andamaints ed igls meds d'ageid ordinaris per dominar las incumbensa digls cumegns.
- *Situaziun speziala*: ainten la situaziun speziala pon singulas incumbensas digls cumegns u digl cantun betg ple neir adampleidas cugls meds d'ageid dalla situaziun normala.
- *Situaziun extraordinaria*: ena situaziun è extraordinaria, sch'igls meds d'ageid dalla situaziun normala u speziala na tanschan betg an numerous sectours per las incumbensas digls cumegns e digl cantun, u schi en grond domber da persungas è pertutgia digl cass da donn.

Stab directiv communal Surses

Igl stab directiv communal ò la cumpetenza da dar damogn a situaziuns spezialas ed extraordinarias. El sustigna igl mastral e las instanzas communalas (executiva) tar la direcziun, la coordinaziun e l'execuziun dallas maseiras an cass da situaziuns spezialas ed extraordinarias. La structura da basa d'en stab directiv communal s'orientescha alla grondezza ed igl domber d'abitantas ed abitants digl cumegn scu er agls riscs e prievels identiftigias ainfer igl territori communal.



Pensums:

Igl stab directiv communal peglia an atgna responsablada tottas maseiras necessarias tgi sa dattan digl camp d'incumbensas. Egn digls pi impurtants pensums digl stab directiv communal durant e siva en evenimaint, è l'infurmaziun dalla populaziun pertutgeida e dalla publicitad. Antras en'infurmaziun precisa e conforma agl taimp, vign contanschia ena pacificaziun dalla populaziun, chegl tgi pò gidar a dominar da maniera pi optimala igl decurs digl evenimaint.

Responsablada:

Schi en evenimaint metta an priewel la populaziun e/u las sias basas da veiver, ò igl stab directiv communal l'incumbensa d'erueir schi spert scu pussebel scu tgi chel evenimaint pò neir domino cun igls meds tgi stattan a disposiziun. Igl stab directiv communal fixescha cun tge maseiras tg'igl evenimaint duess neir domino e coordinescha siva las lavours dallas forzas d'intervenziun, tgi èn participadas alla realisaziun da chellas maseiras. Lavour da stab è lavour da squadra: la lavour vign reparteida ainfer igl stab. Igl schef digl stab magna la lavour digl stab. El è responsabel tg'igl process da lavour digl stab vigna observo. Igl commembers digl stab directiv communal èn obliias da sa participar a purscheidas da scolaziuns e perfecziunamaints digl cantun.

Antrada an vigour

Cun l'antrada an vigour da chesta lescha vignan dissolveidas las leschas davart l'organisaziun da catastrofes digls cumegn uriunds da Bivio, Cunter, Marmorera, Mulegns, Riom-Parsonz, Salouf, Savognin, Sur e Tinizong-Rona, scu er tottas determinaziuns tgi stattan an cuntradiziun cun talas.

Tge capeta tar en NA?

Ena refusaziun dalla lescha davart la protecziun dalla populaziun muntess tgi la protecziun dalla populaziun fiss betg garanteida legalmaintg aint igl cumegn da Surses.

Proposta dalla suprastanza communal:

La suprastanza propona alla radunanza communal d'approvar la lescha davart la protecziun dalla populaziun e da la metter an vigour per datum dalla decisiun.

Dumonda da Luigino Maffei d'annular igl contract da dretg da biagier actual concernent parcella an dretg da biagier nr. 5492 ainten la zona d'industrieia Gravas a Cunter e d'acquistar chella parcella correspondententa nr. 5487

La suprastanza communal propona en EA alla dumonda da Luigino Maffei d'acquistar la parcella nr. 5487 d'ena surfatscha da 952 m² cun annullar igl contract da dretg da biagier existent concernent la parcella an dretg da biagier nr. 5492 ainten la zona d'industrieia Gravas a Cunter.

Luigino Maffei è an possess dalla parcella an dretg da biagier nr. 5492 ainten la zona d'industrieia Gravas a Cunter. Igl contract da dretg da biagier era nia fatg igl onn 1997 per ena dirada da 40 onns, vot deir anfignen igls 31 da december 2037. Ossa dumonda Luigino Maffei d'annular igl contract da dretg da biagier e da cumprar la parcella nr. 5487. A tal scopo ò la suprastanza defino las cundiziuns generalas per la compra da taragn an chella zona d'industrieia.

La valeta commerciala digl taragn ainten la zona d'industrieia monta tenor stema uffiziala a fr. 50.00 per m². La suprastanza ò fixo igl prietsch da vendita sen $\frac{4}{5}$ dalla valeta commerciala, vot deir sen fr. 40.00 per m². Tiers igl prietsch digl taragn vignan anc igls costs d'equipaziun da fr. 35.00 per m², uscheia tg'igl interessent ò da paer en prietsch total da fr. 75.00 per m². Tar ena surfatscha da 952 m² dat chegl damai en prietsch da compra da total 71'400.00 francs. Las taxas da notariat e register funsil, la taglia da midada da mang scu er igls costs da terminaziun e da misiraziun digl geometer dalla misiraziun funsila, paian las dus parteidas mez e mez.

L'antrada an possess valess retroactivamaintg sen igl 1. da schaner 2021. Cun chella caschung niss er anc reglada la lengia da cunfegn tranter la parcella e la veia. Chegl per betg stueir cumprar igl taragn tar en'eventuala sanaziun dalla veia. Ins niss a sa sierar ena strefla cun ena largezza da radond 150 cm per eventuals schlargiamaints. Igl petent è nia infurmo davart las cundiziuns menziunadas soura ed è anclieg cun talas.

Tge capeta tar en na?

En dretg alla compra dalla parcella nr. 5487 n'exista betg. Davart la vendita decida la radunanza communal tenor libra raschung. Tar en NA dalla radunanza communal rastess la parcella nr. 5487 an possess digl cumegn da Surses ed igl contract da dretg da biagier existent rastess an vigour.

Proposta dalla suprastanza communal:

La suprastanza propona alla radunanza communal, da lubeir a Luigino Maffei d'annular igl contract da dretg da biagier existent concernent la parcella an dretg da biager nr. 5492 e da cumprar la parcella nr. 5487 d'ena surfatscha da 952 m² ainten la zona d'industrieia Gravas a Cunter per igl prietsch da fr. 71'400.00.

Dumonda digls conjugals Tanja e Sandro Demarmels d'annular igl contract da dretg da biagier concernent parcella an dretg da biagier nr. 8277 e da cumprar la parcella correspondententa nr. 8266, Davos-Clavo, a Salouf

La suprastanza recumonda en EA alla dumonda digls conjugals Demarmels per la compra dalla parcella Nr. 8266 cun ena surfatscha da 469 m² cun annullar igl contract da dretg da biagier existent concernent parcella an dretg da biagier nr. 8277 a Salouf.

Igls conjugals Tanja e Sandro Demarmels possedan en dretg da biagier (nomer digl dretg da biagier 8277) sen la parcella Nr. 8266, Davos-Clavo, a Salouf.

Gugent lessan Tanja e Sandro Demarmels cumprar la parcella ed on sottamess percheigl ena dumonda da compra alla suprastanza communal. Chella parcella sa catta ainten la zona d'angrondamaint dalla vischnanca. Las cundiziuns per la vendita dallas parcellas da biagier èn regladas aint igl reglamaint pertutgont la vendita e la cunsigna da taragn an dretg da biagier a Davos-Clavo e la Gneida digl anteriour cumegn da Salouf.

Tenor igl reglamaint digl anteriour cumegn da Salouf valan las suandontas cundiziuns: igl prietsch da vendita vign calculo cun $\frac{4}{5}$ dalla valeta commerciala. La valeta commerciala momentana monta a CHF 130.00/m² (tenor indicaziun digl uffezi per la valetaziun d'immobiglias GR digls 23 da mars 2021). La suprastanza ò decida da vender la parcella per igl prietsch da CHF 100.00/m², sa basond agl datum digl contract da dretg da biagier digl onn 2012. Igl prietsch da vendita monta damai a

CHF 80.00. Igl costs d'equipaziun da CHF 50.00 scrodan, percheigl tgi chels èn nias paeas gio tar la conclusiun digl contract da dretg da biagier. Per ena surfatscha da 469 m² monta igl prietsch da vendita uscheia a CHF 37'520.00. Las taxas da notariat e register funsil, la taglia da midada da mang scu er igls costs da terminaziun e da misiraziun digl geometer dalla misiraziun funsila, paian las dus parteidas mez e mez.

Ord vista dalla suprastanza communalal dattigl nignas resalvas pertutgont la vendita dalla parcella da taragn da biagier nr. 8266 giavischeida cun ena surfatscha da 469 m² agls conjugals Demarmels. Els ston pero observar tot las stipulaziuns digl reglamaint pertutgont la vendita e la cunsigna da taragn an dretg da biagier aint igls intschess da Davos-Clavo e la Gneida digl anteriour cumegn da Salouf.

Tge capeta tar en NA?


Igl exista nign dretg da cumprar la parcella nr. 8266. La radunanza communalal decida tenor libra raschung. Tar en NA dalla radunanza communalal resta la parcella nr. 8266 an proprietad digl cumegn da Surses ed igl contract da dretg da existent rastess an vigour.

Proposta dalla suprastanza communalal:


La suprastanza propona alla radunanza communalal da lubeir agls conjugals Tanja e Sandro Demarmels d'annullar igl contract da dretg da biagier concernent parcella an dretg da biagier nr. 8277 e da cumprar la parcella correspondententa nr. 8266, Davos-Clavo, Salouf, cun ena surfatscha da 469 m², per igl prietsch da CHF 37'520.00, tenor las cundiziuns digl reglamaint pertutgont la vendita e la cunsigna da taragn an dretg da biagier aint igl intschess da Davos-Clavo e la Gneida a Salouf.

Tinizong, igls 6 d'otgover 2021

Per la suprastanza communalal Surses:



Leo Thomann
mastral



Beat Jenal
canzlist